

Na osnovu člana 23. Statuta Brčko Distrikta Bosne i Hercegovine („Službeni glasnik Brčko Distrikta Bosne i Hercegovine“ br. 01/00), Skupština Distrikta je na 44 sjednici održanoj 07.juna 2002.godine, usvojila

ZAKON O LIČNOM IMENU

Član 1.

Ovim zakonom se uređuje određivanje, promjena i korištenje ličnog imena stanovnika Brčko Distrikta Bosne i Hercegovine (u daljem tekstu: Distrikt).

Lično ime je lično pravo svakog stanovnika Distrikta. Svaki stanovnik Distrikta ima lično ime.

Svaki stanovnik Distrikta dužan je da se u pravnom saobraćaju služi svojim ličnim imenom koje je upisano u matične knjige u skladu sa zakonom.

Član 2.

Lično ime se sastoji od imena i prezimena.

Lice čije se ime ili prezime sastoji od više riječi, dužno je da se u pravnom saobraćaju služi ličnim imenom, koje je za tu svrhu upisano u matičnu knjigu rođenih.

Član 3.

Lično ime djeteta određuju roditelji sporazumno.

Dijete dobija prezime prema prezimenu jednog ili oba roditelja, ako roditelji ne odrede da dijete nosi neko drugo prezime.

Ako se roditelji nisu sporazumili o ličnom imenu djeteta, lično ime djeteta određuje nadležni organ starateljstva.

Ako jedan roditelj nije u životu ili je u nemogućnosti da vrši roditeljska prava ili je nepoznat, lično ime djeteta određuje drugi roditelj.

Ako oba roditelja nisu u životu ili su u nemogućnosti da vrše roditeljska prava, lično ime djetetu određuje lice kome je, u skladu sa zakonom, povjereno staranje o djetetu, uz saglasnost nadležnog organa starateljstva.

Lično ime djeteta, čiji su roditelji nepoznati, određuje nadležni organ starateljstva.

Lica koja su zakonom ovlaštena da određuju lično ime djetetu, dužna su da radi upisa u matičnu knjigu rođenih, prijave nadležnom matičaru lično ime djeteta najkasnije u roku od dva mjeseca od dana rođenja djeteta.

Član 4.

Djetetu kome je određeno lično ime može se, poslije priznavanja očinstva, utvrđivanja ili osporavanja očinstva ili materinstva, odrediti novo lično ime u roku od dvije godine od dana priznavanja očinstva, odnosno od pravosnažnosti sudske odluke kojom je utvrđeno ili osporeno očinstvo ili materinstvo.

Izjava o određivanju novog ličnog imena, u slučajevima iz prethodnog stava, podnosi se Odjeljenju za javni registar Vlade Distrikta (u daljem tekstu: Odjeljenje za javni registar), koje vodi matičnu knjigu rođenih u koju je upisano rođenje djeteta.

Ako se novo lično ime određuje djetetu starijem od deset godina potreban je njegov pristanak.

Član 5.

Prezime usvojenika određuje se u skladu sa zakonom, primjenjivim u Distriktu, kojim se uređuju porodični odnosi.

Član 6.

Po prestanku usvojenja, usvojenik može uzeti lično ime koje je imao prije usvojenja.

Ako je usvojenje prestalo prije navršenih osamnaest godina života usvojenika, izjavu o uzimanju ličnog imena iz prethodnog stava daju lica ovlaštena za određivanje ličnog imena, odnosno organ starateljstva, u skladu s odredbama člana 3. i 4. ovog zakona. Ako je usvojenik stariji od deset godina potreban je i njegov pristanak.

Izjava o uzimanju ličnog imena iz prethodnih stavova ovog člana daje se Odjeljenju za javni registar, u roku šest mjeseci od dana pravosnažnosti rješenja o prestanku usvojenja.

Član 7.

Supružnici se mogu, prilikom zaključenja braka, sporazumiti da za prezime uzmu prezime jednog ili drugog supružnika, ili da svaki zadrži svoje prezime, ili da svaki od njih svom prezimenu doda prezime drugog supružnika, ili da jedan uzme prezime drugog supružnika i tom prezimenu doda svoje prezime.

Supružnik, koji prilikom zaključenja braka promijeni prezime, u slučaju prestanka, može izjavom uzeti prezime koje je imao prije zaključenja braka. Izjava o uzimanju prezimena podnosi se Odjeljenju za javni registar.

Član 8.

Stanovnik Distrikta ima pravo da promijeni lično ime, odnosno samo ime ili samo prezime.

Maloljetnom licu promijenit će se lično ime ili samo ime ili samo prezime na zahtjev roditelja ili usvajača, a na zahtjev staraoca uz saglasnost nadležnog organa starateljstva.

Ako se roditelji koji ne žive u braku ili u zajedničkom domaćinstvu ne mogu sporazumiti o promjeni ličnog imena djeteta, lično ime djetetu promijenit će se na zahtjev jednog roditelja, ako za to da saglasnost organ starateljstva Distrikta.

Ako se promjena ličnog imena traži za maloljetno lice starije od 10 godina, potreban je njegov pristanak.

Ako se traži promjena ličnog imena na lično ime koje se sastoji od više riječi, podnosilac zahtjeva je dužan da se izjasni kojim ličnim imenom će se služiti u pravnom saobraćaju.

Član 9.

Neće se odobriti promjena ličnog imena ili samo imena ili samo prezimena licu protiv koga se vodi krivični postupak za krivično djelo za koje se goni po službenoj dužnosti ili licu koje je osuđeno za takvo krivično djelo dok kazna nije izvršena, kao ni licu za koje se utvrdi da je zahtjev podnijelo radi izbjegavanja zakonom utvrđenih obaveza.

Član 10.

Po zahtjevu za promjenu ličnog imena rješava šef Odjeljenja za javni registar.

O žalbi na rješenje iz prethodnog stava rješava Apelaciona komisija Distrikta.

Član 11.

Ako se lično ime sastoji od više riječi, u dispozitivu rješenja će se navesti kojim ličnim imenom će se podnosilac zahtjeva služiti u pravnom saobraćaju.

Odjeljenje za javni registar će, odmah po pravosnažnosti rješenja, izvršiti odgovarajući upis u matičnu knjigu.

Član 12.

Novčanom kaznom od 200 KM kaznit će se za prekršaj lice koje u zakonskom roku ne prijavi lično ime djeteta, a koje je po zakonu dužno to učiniti, a novčanom kaznom od 500 KM kazniće se lice koje u pravnom saobraćaju koristi lično ime na koje nema pravo po odredbama ovog zakona.

Član 13.

Ovaj zakon stupa na snagu osmog dana od dana objavljivanja u "Službenom glasniku Brčko Distrikta Bosne i Hercegovine".

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Broj:0-02-022-131/02
Brčko,07. 06. 2002. godine

PREDSJEDNIK
SKUPŠTINE BRČKO DISTRIKTA

Mirsad Đapo, dipl. pravnik

This document was created with Win2PDF available at <http://www.daneprairie.com>.
The unregistered version of Win2PDF is for evaluation or non-commercial use only.